

ASEAN perangi COVID-19: Banyak perlu dipelajari dari China, Korea Selatan, Jepun
Astro Awani
14 April 2020
Harits Asyraf Hasnan,

KUALA LUMPUR: Kerjasama ASEAN Campur Tiga (ASEAN+3) dilihat amat penting dalam mendepani wabak COVID-19 ketika ini.

Perdana Menteri, Tan Sri Muhyiddin Yassin berkata banyak perkara boleh dipelajari dari China, Korea Selatan dan Jepun.

Dalam ucapannya sewaktu Sidang Kemuncak Khas ASEAN+3 hari ini (Selasa, 14 April), beliau turut merakamkan penghargaan kepada China yang berterusan membantu Malaysia memerangi wabak itu.

“Kita boleh mempelajari dari China berkenaan pelaksanaan perintah kawalan pergerakan yang dilaksanakan di wilayah-wilayah dan apa yang mereka lakukan selamat menamatkannya.

“Bagi Malaysia, China telah bersama dengan kami sejak mula, dan kami amat menghargai bantuan diberikan China kepada Malaysia sewaktu kami memerlukan.

“Mewakili rakyat Malaysia, kami berterima kasih kepada China atas segala apa yang mereka lakukan dalam usaha menentang pandemik COVID-19.

“Dengan Jepun, kita boleh belajar berkenaan bagaimana mereka berupaya melaksanakan pakej rangsangan terbesar di Asia Pasifik dan bagaimana kita sebagai rakan ASEAN melaksanakannya di negara kita.

“Bagi Korea Selatan, penyelesaian mereka dalam melaksanakan ujian-massa (mass-testing) amat berguna kepada kita di ASEAN untuk mempelajarinya dan dilaksanakan di negara kita,” katanya ketika menyampaikan ucapan pada sidang kemuncak itu petang Selasa.

Malah ujar Muhyiddin, Malaysia kekal berpandangan bahawa ASEAN+3 perlu kekal komited dalam memastikan pasaran dibuka, mengekalkan aliran perdagangan yang normal untuk perdagangan, perkhidmatan dan pelaburan.

“Ia bagi mengukuhkan pemulihan ekonomi serantau tanpa sebarang halangan perdagangan atau gangguan kepada rantai bekalan global.

“Malah, kita perlu menstabilkan pembuatan dan bekalan keperluan asas dan perkhidmatan yang diperlukan sewaktu krisis ini termasuk bekalan perubatan dan produk pertanian yang kritikal - dalam mengekalkan dan mempelbagaikan jaringan rantaian bekalan di dalam dan luar rantau,” katanya.

**© 2020 Astro Awani Network Sdn. Bhd.
(535275-D) All Rights Reserved.**

Source: <http://www.astroawani.com/berita-malaysia/asean-perangi-covid-19-banyak-perlu-dipelajari-dari-china-korea-selatan-jepun-238349>